



Pierre Casetti

Generallinie

Anspielstück zum Strategietag der SP Ostermundigen von 18. Juni 2016

Personen: der generote Kameramann (KM) – der untaugliche Kandidat (UK) – die besonnene Politikerin (BP)

1 Der Schönling

KM hat seine Kamera aufgestellt und ruft in den Vorhang:

KM: Chasch cho, i bi fertig!

UK: *hinter dem Vorhang* Jaja, sofort! *Es passiert nichts.*

KM: Chunnsch itz ändlech? Mir müesse pünktlech aafaa. Süsch längts nid für alli 48 Kandidate, won i hüt am morge muess interviewe!

UK: *hinter dem Vorhang* Jaja, sofort! *Es passiert nichts.*

KM: *ungeduldig Richtung Vorhang gehend* Tammisiech, was machsch eigentlech?

UK: *erscheint mir schwerer Mappe, sich die Kleider zurechtklopfend und die Frisur ausrichtend* I bi ja schon da! Was söll das ghetz. Wen i gfilmt wurde, wott i o chli e gattig mache. *Zupft wieder an seiner Frisur* Geit das e so, si mini Haar luftig gnue?

KM: Jajajaja, sitz itz ab! *UK tut es.* Auso, mir fö aah, isch guet? *Schaltet die Kamera ein und setzt sich UK gegenüber.* Auso Barthi...

UK: „Bartholomäus“, bitte, säg mir im Film immer „Bartholomäus“, mit mim volle Name han i di bessere Chance, gwählt zwärde.

KM: *entnerot* Mmm, muess das sii, tammisiech, itz müesse mer wider vo vorne aafaa. *Geht wieder zur Kamera und schaltet sie erneut ein und setzt sich wieder.* Auso, Bartholomäus, Du kandidiersch für e Gross Gmeindrat vo Ostermundige. Was isch dis wichtigste politische Aalige?...

UK: *schaut nach einem Gedankenblitz entgeistert* ist Publikum Ääh, itz han i zWichtigste vergässe – mini Sunnebrüe! *Rennt in den Vorhang zurück.*

KM: Für was bruuchsch du hie inne e Sunnebrüe? *Entnerot für sich* Itz müesse mer nomau aafaa. *Geht wieder zur Kamera und schaltet sie nochmals ein.*

UK: *kommt zurück mit einer modischen Spiegel-Sonnenbrille über der Stirn*
Das verbesseret dänk mini Wahlchance!*

2 Der machiavellistische Zyniker

KM: *setzt sich wieder* Auso, Bartholomäus, Du kandidiersch für e Gross Gmeindrat vo Ostermundige. Was isch dis wichtgste politische Aalige?

UK: Ja, mis wichtigschte politische Aalige isch, dass i gwählt wird!

KM: U für was wosch di de iisetze, we du de gwählt wirsch?

UK: Ja, natürlech derfür, dass ig i 4 Jahr wider gwählt werde!

KM: Ja scho, aber inhaltlech?

UK: Was inhaltlech?

KM: Jä, du muesch doch inhaltlech öppis verträte. Öppis muess dir doch speziell wichtig si: bisch für mee Velowääg? Bisch für nes Jugendcafé? Bisch für mee Spitex?

UK: Aha! Jö, das isch mir eigentlech gliich. Das weiss ig itz o nid grad. Wenn i gwält werde, stellen i de e PR-Mänäger aa u de frag i de dä aube, was so grad im trend isch, u was i de folglech muess verträte, für dass i 4 jahr wider gwählt werde.

KM: Ja aber – du kandidiersch doch für d SP, u d SP steit für bestimmte wärt ii, für bestimmti inhalt...

UK: Auää! D SP, di wott doch o nume di nächste wahle gwinne, wi alli andere parteie. U das gling umso besser, je weniger idee me vertritt...

KM: Ja, scho. Aber uuffalle muess si derbi ja doch. Drum söttsch Du als SP-Kandidat irgendwie doch e chli linki positione markiere!

UK: Ach so? Jö dämfau, das chan i natürlech scho, we das ums verrecke muess sii...

3 Der Linksabweichler

KM: *setzt sich wieder* Auso, Bartholomäus, Du kandidiersch für e Gross Gmeindrat vo Ostermundige. Was isch dis wichtigste politische Aalige?

UK: *unvermittelt in präziöses Bühnenhochdeutsch wechselnd und unangenehm auf seine nervös kreisende rechte Schuhspitze schauend* Mein Anliegen wurzelt, wie sich das für den Kandidaten einer sozialistischen Partei gehört, im „Kapital“ von Karl Marx. Dort lesen wir bekanntlich den inhaltsschweren Satz *er entnimmt seiner Mappe Bd. 1 des Kapitals und schlägt es auf und liest feierlich und sehr exaltiert* : „Der Reichtum der Gesellschaften, in welchen kapitalistische Produktionsweise herrscht, erscheint als eine „ungeheure Warensammlung“, die einzelne Ware als seine Elementarform. (MEW 23; 49)“ Nun, was versteht Marx unter „kapitalistischer Produktionsweise“? Marx versteht darunter...

KM: *Geht zur Kamera und stellt sie ab* Auso Barthi, itz hörsch sofort uuf mit däm linke Züügs, so verliere mir nume Stimme!

UK: Aber inere sozialistische Partei müesst me doch...

KM: D' SP isch ke sozialistischi Partei, sondern e sozialdemokratischi! Bi üs het das linke züügs nüd verlore

4 Der Rechtsabweichler

UK: *enttäuscht* Aha, ja... das heisst: mir dörfe nid linker sii, als d Bevölkerung?

KM: Ganz genau!

UK: De darf i nume sache säge, vo d'lüt o finde?

KM: Ganz genau! Mir fange no es letschts mau aa. Ah - u de muesch normal Bärndütsch rede u muesch da i d Kamera luege bim schnurre, nid uf dini Schue, klar? *Schaltet die kamera wieder ein und setzt sich wieder* Auso, Bartholomäus, Du kandidiersch für e Gross Gmeindrat vo Ostermundige. Was isch dis wichtigste politische Aalige?

UK: *steif in die Kamera glotzend und in schneidendem Tonfall* Ja, i finde das, wo z Ostermundige alli finde: mir hei hie eifach vii z vii Uusländer. Au das farbige Pack, wo me duurend auf dr Strass gseet - au die fromme Jugowiiber mit ihrne Chopftüecher, chunnsch dr vor wie im Wallis vor 50 Jahr! Das muess wäg! Eifach wäg! Ischtambul eifach!

KM: *Geht zur Kamera und stellt sie ab* Auso Barthi, itz hörsch sofort uuf mit däm rächtslastige Züüg, das chöi mir nid säge, das seit scho d SVP!

UK: Ja, aber das isch doch genau das, wo d'lüt wei ghöre! So macht me stimme!!

5 Der liberale Egoist

KM: Villicht scho, aber d SP cha so öppis nid säge. Los - itz seisch eifach mau, was Du ganz persönlech z Ostermundige möchtisch anders ha, gäu, eifach du ganz persönlech? *Schaltet die Kamera wieder ein und setzt sich wieder* Auso, Bartholomäus, Du kandidiersch für e Gross Gmeindrat vo Ostermundige. Was isch dis wichtigste politische Aalige?

UK: Jää..., wenn i mit mim BMW dür Mundige fahre, de reg i mi numen uuf: niene chame richtig mit emene 60er düreblöche, au 3 minute chunnt wider sone Bus, wo der ganz vercheer lahm leit. Das isch eifach e seich. Drum säg i: schluss mit däm huere ÖV. Freii Fahrt für dr freii bürger!

KM: *Geht zur Kamera und stellt sie ab* Auso Barthi, itz hörsch sofort uuf, gäge ÖV z flueche. Das chöi mir nid säge, mir si ja für ds Tram gsi.

UK: Ja, aber huere siech, was söll i de säge? Wenn i säge, was me links sött säge, isch es nid rächt. Wenn i säge was me rächts wott ghöre, isch es nid rächt. Wenn i säge, was i säuber finde, isch es nid rächt. De söu mir haut öpper vo dr SP Ostermundige säge, was i söu für ne politischi meinig ha. Aber das chöi tir ja äüä o nid, dir heit ja o ke idee...

5 Die Generallinie der SP Ostermundigen

BP: *die bis hier still im publikum sass, steht wie von der tarantel gestochen auf und legt los* Natürlich hei mir idee. D Wahlkommission het

Folgt eine kurze darlegung der wichtigsten inhalte (die man für die folgende diskussion wohl auch schriftlich zusammenstellen müsste), mündend in den Satz

Das si d Inhalt, wo d SP i der nächschte Legislatur möchte verträte. Zu UK U mir erwarte natürlich schon, dass sech d ratsmitglieder haubwägs a dene legislaturziil uusrichte.

6 Die demokratischen Zusätze

UK: Jö, i weiss nid, das isch haut immer z gliiche, das isch das, wo d politiker sit jahre säge vor de wahle. *In den Saal zeigend* Aber di vile andere kandidate da, di hei doch sicher o idee. Di sölle itz mau säge, was si z Ostermundige möchte andersch ha, u we si das gseit hei, de find i de villicht schon no öppis, won i o als mis politische aalige chönnt verträte! U so chönnt i mir villicht de sogar der PR-Mänäger spare! Di cheibe si nämlech huere tüür!